

DEPORTE

Inauguracion Centro Hubenil Tanki Leendert pa dia 15 December

ORANJESTAD - Pa December próximo cu ta bin, lo bai tin e apertura oficial di e Centro Hubenil Tanki Leendert, cu despues di varios anja cu e vecindario tabata priva di un centro social, porfin esaki ta bira realidad, despues cu di 1987, cu a cuminsá reactiva e directiva y a cuminsá cu expansion y remodelacion di e centro.□

Inoficialmente e centro aki a habri su portanan na September último, caminda cu di biaha esaki a demostra su necesidad den e bario, unda cu diferente ramo di deporte a usa e tereno, pa practica, mientras cu e edificio tambe ta basta ocupa, cu diferente reunionnan y cursonan.

Como kiera cu e centro tin diferente facetonan na unda e ta contribui na desarrollo di e comunidad den e bario aki en particular a dicidi pa tene un siman di actividad, pa celebra e apertura oficialmente.

E siman cu a worde es-

cogi pa tene e celebracion aki, ta esun di Diadomingo 8 di December te cu dia 14 di December 1991, unda cu e culminacion lo ta pa 12or di anochi, pa declara e lugar habri oficialmente apartir di 15 di December 1991.

E programa lo bai ta cu riba Diadomingo dia 8 di December lo tene un santo sacrificio di misa na Kapel Monte Calvario, sigui pa u koffie morgen cu bolo y chuculati, cu lo ta gratis, esaki lo bai combina cu exposicion di potretnan mustrando e historia di e club.

Den siman lo bai tin diferente actividad deportivo, cu ta limita na equiponan di e bario di Noord, Tanki Leendert y vecindario, caminda cu un actividad cu sigur lo hala hopi atencion serca e chikitonan, lo ta Diahuebs dia 12 di December, caminda cu lo bai tin pa e muchanan Poppenkast y tambe un goochelaar, ademas di weganan cu tin programa

pa nan y parti anochi pa 8or lo bai tin e encuentro di Sesó Sport entre e equipo di Centro Bario contra Osticeba

Dia 13 di December lo tin continuacion di e weganan di Domino, caminda lo hunga e final.

Riba Diasabra 14 di December lo tin un show cultural pa finaliza e siman, unda cu pa mei anochi lo declara e centro oficialmente habri.

Directiva di Centro Hubenil Tanki Leendert, pa e ocasion aki a forma tres comision di voluntarionan cu ta encarga pa e realisacion di e siman deportivo aki y sin tin algun persona cu ta interesa, pa yuda, nan por contacto libremente na e centro pa mas informacion of sino serca Toni Dijkhoff tel. 27271; Vito Oduber tel. 34289; Tico Dijkhoff tel. 25104 y Raymond Hernandez tel. 28280.

Cu cooperacion di un y tur e siman deportivo aki lo por bira un exito completo.□